

印

竹

杖

自弁

虞氏春秋不經見。史稱其窮愁著書。似書偏于窮愁。宐也。然安世博洽。文饒藻采。彼曷嘗不享膏腴。列華寵哉。大都性之所近。則樂爲而不疲。甘苦悲愉。因時

散見而傳與不傳。是又福命之所司。人亦求自足其分量而已。桓宣武平蜀。置酒李勢殿。桓素有雄情爽氣。加邇日音調英發。一坐歎賞。道之行也。馮曲陽志命興漢。揚眉抵几。而兩主擯斥。

偃蹇窮困。空文自老。遇之窮也。
然爲元子。易爲敬通。難悲哉。窮。
愁非著書。誠亡以自表見者。余。
生遭礧砢。孤旅罕儔。向有論著。
悉委兵燹。是皆穴鼠寒蟄。啾唧。
啁嘈。引證亡半。卷之書。論難鮮。

一介之朋。意之所至。伸紙輒書。
如農家曆。如酤傭簿。流落不偶。
顛躓亡聊。悲哉。余又豈願以著。
書見哉。則誠負此窮愁矣。然聞
見頗質。議或不詭。雖土壤細流。
于虞初稗官。不亡小補云。吉水

施男

叩竹杖

目次

滕王閣

耗磨日

象緯

江樓

南征紀畧

雙關口

楊子江

艷體

拂水山房

金閭五日

斟酌橋

文選樓

王軫石

瓊花觀

四隤山

返寓

吉郡詩人

老泉東坡出處

丙申中秋

鈴山堂集

玄白堂

敬亭詩社

家匪莪

抱石魚銘

天逸閣

敬亭山

硤石江

家孝章

祀竈

春日

選詩

讀史

張于湖

輓家河采

節媛

習尤

李北海

阿閣

積善庵

何母歌

塔影園

顧螺舟

半塘寺

割股

丁酉九日

虎丘

歌奚

顧同叔

趙國子

句曲道中

來諗居

叩竹杖

吉水施男偉長著

新建徐世溥巨源閱

滕王閣

閣落成于甲午。檄詩徵詞。遍及宇內。蕭奉嘗有
云。千變百伎。總不出王子安一序中。誦之真爲
齒冷。然今人類貶絳州而推昌黎。韓固尚矣。絳
州稱齒弱齡。對客抽思。元嬰千載。藉之不朽。後

此惟臨川攬秀。實張吾軍。余亦不出子安範圍者。得二首。聊自揶揄。匪敢應中丞之求也。談笑當年賦已成。閣名繇此記元嬰。代加丹雘崇新址。誰寫茗華刻綺楹。我愛厭原彌合杳。人懷臨汝獨縱橫。閬州亦有棖題在。不見離離砌草生。倒景西流負郭雄。千帆吳粵此分風。地經戎馬榛蕪久。閣藉旌旄結構崇。蕭史峰頭微着雨。秦人洞裏半垂虹。莫辭青眼當檐醉。一抹雲霄萬

古同丙申正月十日

耗磨日

播遷以來不簡曆頭。鼯鼠澤國滿腹輒已頃筠。籃適市家河采曰耗磨從所忌。曷休之因舉趙冬曦詩耗磨傳茲日縱橫道未宜。但令不思醉翻是樂無爲。余哂焉命倌戲此代柬。我生欣微託恥逐埃塵奔。人機俗益詭胥動以浮言諄戒。慎此日安坐不臨軒。丈夫謹容色。獨余凜折轅。如何瓢杓放。對茲彌畔援。天心未可測。尚之亦

稍恩曾見摩壘急。鞭輓沒蹏痕。孤虛信難問。飽
翻任鵬騫。

象緯

天官志莫妙于晉余亦從耳食悉者廿三日得
宋鄭漁仲通志畧喜其於此條貫簡易屬門人
命侯錄之并余所急欲明者率成韻語就湯子
玄翼正焉玄翼博極群書力追大雅將無哂余
糝蓼泮浪耶終之夜郎自匿未敢遽干天子旌
旗也數遍天街街分南北事渺茫金庭可卽是嘗陽
荊州星占嘗愁當景灼連滄海已見區殊別井
陽一名金庭

疆縱壑鯨鯢鱗未朽。

淮南子鯨魚死而彗星出。

奔閑駟馬策

垂長。

王良策馬車騎滿野。

新編浹滌疑難了。擬托晨風問

草堂。玄翼名燕生宣之太平人。

江樓

三月朔日飲吳震生江樓。崇論宏議，興會標舉，而終期之以隱。震生受塵江上三世矣。秉燭接竿，遇物工吟。崑銅夙有，廚顧俊及之目。兩人皆余所盍簪而爾思者。宴笑一室，奔駟莫及。汚人何必元規塵哉。小築江塍好，盃揮落炤邊。隣箏擲柱底，客棹倚尊前。大隱隨朝市，雄詞聒几筵。少微公等在，吾道許重玄。正是乖違久，相逢意

倍親登樓。如有約種。林欲爲鄰。喜共盤餐。盡翻
令笑語真。幽棲殊愧爾。敢曰慰吾民。

南征紀畧

紀畧益都孫道相著。初得之于來元成。閱未閱也。廿三夜。偶簡趙韞退使晉諸律。童子并以陳焉。馳騁貫穿。芟夷剪截。真可呼善長一堂打手都盧者。至吐詞俊拔。造徑曲折。蛛絲藕孔。若斷實連。文情幽綺。怪炫極矣。始欲錄韞退數章。挈當卧遊。得此如南威西施。倩盼各呈。觀者未敢遽作畸重思也。山水蘊靈性。妙藏難入室。圓蒼

亦好文陋彼劉鑿質。寶跗洩玄枵。耀倫邁等匹。
兩珏夾琮琤。杜律與韓筆。味之驟生瀾。甜此中
邊蜜。隘俗多尚同。錯揉述芬苾。捨茲輞川心。惟
羨嘉陵驛。我懷在緇青。朗吟高擁膝。願化雙鴻
鵠。與之齊騫逸。

雙開口

四月初三日泊雙開口望白門可三十里舟碇
矣榜人于尾繫纜加牂倍飭踰嘗時礮車雲起
西北未幾檣發檣摧傾欹中流舉舟墨色亡復
人理余從浪花電火中聽榜人呼曰及岸矣肉
薄捫登雨如溜雹如拳霎時清霽瞠目熟視乃
東岸也橫江而渡賴此馮夷達旣亡有舍亦不
能安坐獲存豈非天哉是夜宿佛廬得五言絕

四首痛定方能晤時危敢計全寸心如縷結持
底報長川大道亡平陂庸人喜倖生縣知濡尾
者不向此中行燎火衣還注饑來翻作愁捨生
成底事雪炤把吳鉤人說風波險風波我不辭
平生難語事到此總無私

楊子江

江自黃天蕩西逕儀真。繇瓜步東北趨通州入海。寰宇記云。南對京口。濶四十餘里。曹子桓見而興歎。祖士稚擊節中流處也。今濶可十八里。余惑焉。年來自瓜儀南涉。凡三度。自京口北濟。兩度俱值無風。默記長年櫟楫。以九章法規之。儀真不甚相遠。瓜步竟差三之一矣。胡汾詩。數家新住處。昔日大江流。悠悠千載。陵谷何嘗未。

審後來濟者得如余之閒心不也。黃梅雨過倍
蕭騷。一葉橫流笑作勞。北固山當京口路。廣陵
城絕海門濤。瓜洲舊在江中。潮信通廣。幾家蘆
尾爭新墅。萬疊潮頭識故臯。還想他年塵跡變
難將通塞問靈鼇。初八日。

艷體

十一日。憇丹陽。那步練湖。湖濬樓開簾捲。盈盈
傭來。垂鑲膏沐。傾注移時。友人排諧謔。余曰。王
遂東云。爾鄉頰糟粉肉。響屨版袍。能賦艷歌一
洗固陋乎。余領之。得二絕。殊愧不工。然終墮綺
語結習矣。晨起。欹垂倭髻。亂盤鴉。舊暈痕。頰簪
角斜。呵罷欠。申慵舉手。佯搔玉導理。菱花新裝。
如雲鬢髮。澤芳蘭結束。勾亭棄膩殘手。護衣篝。

微炷火背人偷眼脫中單

拂水山房

廿三日從慧日寺命楫徑西關不數里松楸陰
蔭亭館虛寥水田釣艇聊浪娛目及山房入門
爲秋水閣屏展龍嵒縣岩飛濺古所稱海虞石
室礪磈處也右瞰巨湖前滙清溪堂築其中軒
敞宏麗迤左則曲房連檻庖湍軒除迷眸炫趾
思出匪夷右爲屋梁爲石磴浣掬箕踞涼颼森
耳環宅中邊夾植老梅修竹池蓮井桐引水激

池婆娑葳蕤。彌供矚玩。偏東。窿然中起。舊爲耦
畊堂。程孟陽賦詩讀書所。今穿爲馬鬣。兩尊人
千秋窀穸。是馮依焉。展拜之餘。因思山房楔棹。
顏曰明發。是將藉此爲瀧岡西陽。玄閔裡享之
宮。豈徒綠野輞川。觴酌宴遊。娛悅目前已也。成
排律二十咏。夙昔敦嘉尚。微生逐轉蓬。長懷君
子室。側近古人風。茂徑臨山麓。清渠豁石磯。亭
臺俱別墅。墓隧盡群公。

道旁俱
巨室墳

巨壑一流遠。豐

湖四匯同。地當青嶂合。門倚綠烟叢。高閣憑虛。
靄橫橋落漲。洪苔封軒砌。古檐敞。画棖崇。曲房
連宛轉。回榭瞰玲瓏。雲樹窗嘗皎。冰炎氣不通。
寒泉汲宇下。碧澗遶牆東。枯枿梅椿瘦。交稍竹
影籠。池蓮折臂藕。屋葉響秋桐。舊隱羅名彥。新
阡起竈宮。漆鐙光炤夜。華表望侵穹。匪藉盤遊
樂。聿爲盼嚮隆。經營歸素志。締構識淵衷。梓澤
榛蕪久。瀧岡碑版雄。遵時聊自晦。抱道署稱蒙。

公自號

蒙叟

陋彼平泉戒甘茲半野窮

公堂名半野

金閭五日

五日繇海虞抵金閭。日高春矣。沿江競渡。伐鼓
憂金。依然楚些遺風也。得一絕。黃雀風微。船趁
餘。閭門雪浪打姑胥。采標奪得誰先笑。畫閣盈
盈十五初。迴橈點沫起龍魚。舊俗汨羅此不除。
相國鴟夷吳苑沼。隨風却去弔三閭。

斟酌橋

松陵倡和集。皮襲美。臯橋依舊綠楊中。閭里猶
生隱士風。惟我到來居上館。不知何道勝梁鴻。
陸魯望橫絕春流。駕斷虹。憑欄猶憶五噫風。今
來未必非梁孟。却是亡人繼伯通。余兩徑吳門。
伯通絕響。亡待論客。此者緇冠羽服。束頂逢迎。
夷清惠和。炙手薰熱。未審伯鸞。賃春時。亦作此
刺。嘈延緣不。天下事變態亡限。惟任情率真者。

可亡煩此矯強也。十八日泊虎丘。斟酌橋待發。
書此斷虹。遮雨過西隣。水漾風蒲蕩。客塵草屨。
辭山還遲月。陶瓶沽酒漫慚人。要離塚畔誰高。
士梅福門前。自要津去去。慈湖山下路。白蘋亡。
數足逡巡。

文選樓

江都舊城有文選樓相傳昭明監撫之暇弄筆
于此今其地爲旌忠祠祀少保武穆前楹塑岳
王像後卽樓樓亦塑昭明像衣冠都郁存意而
已會稽徐五假寓其側余數四往覆兩人未嘗
不升高而憑弔也得五言古一首蘭陵敦戒業
叢恥覆臺城德施早殂落乃傳文選名茲樓經
幾劫代創疊稱榮前對觚稜古云祀宋忠貞東

窗書一紙。大河亡堅營。追崇割舊址。幽對相悲。
鳴完顏與賊景。兩兩縱長鯨。君心亦悱惻。握手
振塵纓。側足青囊望。頽日落高楹。會合有時命。
亡爲白鵲盟。六月初三日。

王軫石

軫石詞賦文章，妙絕天下。所著淮襄荆蜀三論，敬輿子瞻當望而却步者。旅泊邗上十年，好客篤友，亡倦色。丙申長夏，招余話沅芷事，手強口棘，不能也。然日剖心，莫逆。東方曼倩有云：大丈夫相知，何必撫塵而遊。垂髮齊年，偃伏以日數哉。呈十五韻。海影翻俄頃，江邦寄謬悠。一枝聊戢羽，巨壑可藏舟。浣漱隨縣舄，歷音嚴隆看典裘。

忘懷八口謫。盡力一編讐。樞几嘗遺緒。匡床不
奈髹短章。臣買馬先駕。屈曹劉。星紀中原脊。雷
塘帝寢州。停軒亡間隔。作賦有倡酬。咸歎索墳
在。聿瞻風雅留。余生懷篤實。君志薄纖柔。讀史
同折獄。律人喜宣猷。曾將封畛括。亦藉韜鈴籌。
聚米徒成勢。團沙握未周。前人耽述作。吾道慎
居由。确礫須還墜。榛蕪或起憂。軫石卽于一南
州人。六月十五日。

瓊花觀

觀在廣陵新城。一名后土祠。政和中改蕃釐院。唐李衛公咏唐昌玉蕊卽此種也。海陵南下徙其植北去。未幾故株復生。至元後枯。其種遂絕。石臺迄今猶存。都門梁公秋假息焉。促膝數巡。繾綣殊甚。已而言歸。入寶其昆仲。木復置酒其側。慷慨激昂。縱談及曙。一時蒼涼。惟文杏數十株。美魑相向而已。廿一日。皎潔星河。夜未央。竭

來此地共徜徉。森枝已入金人苑。廢圃猶傳后
土墻。漫倚亭臺占去住。還拚歲月老行藏。唐昌
寂寞前期在。鴨脚風微殿角涼。

四隤山

廿六日返鳩茲宿四隤山昔項籍敗垓下所從
惟二十八騎漢兵數千追至羽乃引騎因山爲
圓陣石上馬跡猶存事雖未足信然戰敗而奔
殘騎經此當不誣也得二絕戰罷章邯西入秦
普天拱手率稱賓鄉思一夜咸陽火據得山頭
值幾塵山前叱咤吐風雲戲馬亡聲墮戰裙底
死非嫌江左小人千多少未歸墳

返寓

七月朔日歸自維揚語及雙開口事忽忽如夢
然余之所急者負罌束芻待舉饘粥青眼饑腸
索莫殆盡此等危景又不知何術脫此黑洋也
幾墮江風險相看倍慘魂情猜還錯愕語重故
寒溫破組機難斷周身舌尚存菱花足暈眼知
爾未晨殮亦解馳驅苦難如燕雀馴入門腸幾
轉開篋語先醇自是人情薄非關骨相屯羣鹽

聊此夕吾道肯終淪

吉郡詩人

吾吉詩人自趙宋七百年來名公巨卿踵接輝
聯下如山巔水涯布衣蔬食不乏琳琅然在耳
目之外與碑誌載集所未數見者得四人又皆
唐季五代才也其春容鴻章或錯出諸書未可
知而余一人簡短篇寒所見僅此雖寥寥數言
亦前人精神所繫姑錄付後之學者獲知流風
之所自也陳諡吉州人題螺江廟云廟裏松杉

蕭颯風廟前江水碧溶溶。凭欄不見當時事。落日遠山千萬重。太平興國中。張齊賢出爲本道轉運使。至廟留覽碑題俱打去。獨存諛詩。因知名夏竦。松廬陵人。與劉洞齊名。爲節度使陳德誠所知。德誠贈詩曰。建水獨傳劉夜坐。螺川新有夏江城。竦松江城詩云。雁飛南浦。鐘初動。月滿西樓。酒半醒。晚來羸駟依前去。雨後遙山數點青。陳甫字惟岳。吉水人。贈黃岩云。清時不作

登龍客。綠髮閒流。傍草堂。章江感懷云。一雨洗。
殘暑。萬家生早涼。村居云。暮鳥歸巢急。寒牛下。
隴遲。曾庶幾。吉州人猿詩云。孤猿鎖檻。歲年深。
放出城南百丈林。綠水任從聯臂飲。青山不用。
斷腸吟。四人俱見古今詩話。十八日。

老泉東坡出處

吳匏庵咏赤壁詩西飛孤雀記何詳。有客吹簫
楊世昌當日賦成誰與註。數行石刻舊曾藏。世
昌繇竹進士與東坡遊赤壁賦所謂客有吹洞
簫者卽其人也。余往得之來元成每喜爲人誦
之。有謂余曰。讀賦何須如此穿鑿。東坡老泉出
處安在。彼蓋以坡泉二字爲菴齋類。而老與東
則其所自命者。殊不知東坡老泉真有出處。未

易爲淺人着注脚也。按允明嘉佑集十數年前有一老翁蒼頭白髮偃息泉上就之則隱而入于泉洵覓以石建亭覆之而爲之銘眉州誌老翁泉在驀願山東二十里東坡則今忠州地唐白傳刺州時種花遊賞作詩有何處殷勤重回首東坡桃李種新成又最憶東坡紅爛熳野桃山杏水林檎子瞻自敘云平生自覺出處老大小粗似樂天非東坡之名偶爾同也余曩咏樂天

詩亦有丹鼎淒涼永不成。除書又到崔猿驚。忠
州却愛東坡好。種得桃花倦倚晴。其號實始于
此老翁。泉今亦爲補咏。恐後之笑原博者。又轉
而笑余也。驀顧山下老翁泉。碑古亭摧石甃穿。
只恐將來寒液盡。老翁却得老蘇傳。八月初三
日。

丙申中秋

十五日中秋江邦三載獲克家居鄉里訝爲罕
事出其簪珥市鮮沽酒徙倚終宵圓魄澹如猶
自徘徊風露延佇不休也張祐詩人間繫情事
何處不相思月通人遐余又將愛此朦朧一規
矣輕雲閣雨月微茫澤國蒹葭亦故鄉幾處笙
歌喧夜漏萬家砧杵動宵光江村蝦菜杯嘗滿
嶺表魚書道正長蕭瑟朦朧還獨看怕分清夢

到瀟湘。

鈴山堂集

介溪怙勢。翦殺誠揆。席中第一豺虎。而余之所
最爲扼腕者。有兩人。曾忠愍銑。楊忠愍繼盛。是
已。楊其腹心患。曾則借邊釁。爲殺桂洲地。殘狠
賊戾。墮此長城百世而下。全爲惜悼。若太倉之
死。則非其罪。聞俺荅闖入時。盡抽其精騎。護一
嬖妾。至疎虞潰決。不可收合。肅皇帝重失律之
誅。大司馬在所不免。况三輔要地之握重兵者。

乎。弁洲欲蔽辜前人而盡以其事歸之于嵩。是
又未免下流難居矣。當嵩隆盛日。縉紳知名之
士曳裾及門者何限。世蕃服誅。奔走華亭。彌縫
掩匿。求爲不滓。亦自不少。而論者于荆川末路
之出。不亡少議。不知荆川博極群書。自負有爲。
時南北用兵。當路夾袋中。亦往往難其選。余見
羅念庵報聶貞襄書。雅相引重。謂克當其才。貞
襄正人。又握本兵。急欲得賢爲國家用。必不徇

分室私者。時大權盡歸于嚴。應德放廢久。或借之以用。其所未足。事未可知。丈夫委質稱臣。權國家之利害。與已之能不。審度揣量。可爲則宛曲。冒嫌雖或差跌。人終韙之。不可爲。寧潔身自好。返我初服。而必曰。忠臣求孝子之門。則廬墓矯強。割股殘決。俱伊傳周召選矣。此等議論。多宋人倡之。以實聖經。殊不思文煩而質益。晉唐以前。事恕政辦。網疎節張。具在史冊。學者不可

不知也。廿三日得鈴山堂集。姑識於末。

玄白堂

堂爲禹金先生讀書處。一樓可十笏。地文釋道紀諸書率從此出。余初抵宜。蔡大美及其孫幼龍先卜此以待。宣固多賢士。而家次仲獨偕此兩人。昏曉靡間。利瑪竇曰。友者我之半。傾蓋間忘年引重。豈非通德舊里。涵泳漸漬之被于人者深乎。堂固已易主。陸放翁記少陵高齋在東屯者。曾三易主。李氏居數世矣。唐大曆故券猶

存今過奉節者知弔浣花翁而誰知有李氏况
去李氏又未知幾姓也子美猶自膾炙人口不
歌人可以不自知所壽耶成十六韻余昔年髫
苗側聆郡有宣及余髮覆額鹿裘覩如椽蹉跎
三十載迄此遂微涓樓小僅容几云是木榻穿
前人薄華飭惟耻道不傳流風煽未墜薪火至
今然蔡子秉淵衷春容集思研壇坫執新勒鏘
金夾管絃次仲敦家學尚理富奇篇好挾重淵

秘入微詞愈妍。諸孫率環寶。幼龍穉齒賢。昏朝
亡間晷。發語吐澄鮮。我來值秋潦。登歌無二田。
投餐先授室。麗澤通高甄。江都仲舒宅。子雲武
檐連。遺墟迷舊草。芳躅百世延。九月初八日。

敬亭詩社

宛上風雅。強半大美。杓司輩主之。歲凡四集。集分三題。或律或古。參互較閱。四方戾止。懷鉛槧者。亦得廁焉。綽有古人時敏敬業遺範。今秋集沈二允世忠堂題分五言古。余以羈旅濫竽。不顧其見而唾矣。酒樓秋月。萬壑織寒烟。結隣先在曠。棲鵲驚巢轉。射波遙相望。光老市亡浮。白風來虛決。諸此素心人。陟樓恣駘蕩。樹影落樓

聊送懷欣微尚。豈亡秋可悲。停杯聊冲放。送家
次仲之山左。野色乘秋暗。寒雲澹不洗。霜信亦
南翔。征車胡北抵。峩峩東岱山。濁河間清濟之
罌。望貝宮川原。何迢遞。猶子秉鐸衡。崇旄開雙
綦。因之攬風徽。魚而魴與鯉。啣杯勿辭盈。遙望
樹如薺。顧影各躊躇。木脫波微瀾。敞亭秋集崇
岡。連接軫。娟秀發幽顏。野田穿寒潦。千楓樹若
殷。陟徑恣探討。俯視隔區寰。群公方習靜。獨壑

一鳥閒。更上額珠望。葉落響秋山。謝李何繇見。
一去不可攀。廿四日。

家匪莪

集句非起于半山古諸侯卿大夫獻酬揖讓陳
詩喻志固先揚其波矣。取材他人綜會俄頃片
言居要賞譽彌日。余宗匪莪可謂集大成者。余
偶寄箴頭畧爲讚唱。彼卽依韻走復四章。而又
爵里名地感愴慰勞亡不確當。覺余竟日操觚
猶未免代斲傷指也。異哉。余詩半山堂畔舊橫
陳。麗句繇傳獨擅津。偶與何難矜瓦注。無縫却

自愧鍼神。晴安一點鱗。斯動。頗着三毫貌。愈真。
鞭策騷人。誰最健。惟君雅調。近先民。匪莪集會。
取日虞淵。事已陳。二毛羈旅。尚迷津。龍泉合劍。
沈豐獄。雞骨占年。拜水神。每向遙空書恨字。不
須隨俗問眉顰。十季湖海英雄淚。可是西山採
蕨民。世情誰是舊雷陳。何必長安問要津。十載
滄桑猶在眼。幾年離亂總傷神。世無儀狄誰供
酒。隣有西施不效顰。三徑久荒陶令宅。春畊亭

障識遺民直叩天門欲自陳。未知何路向龍津。
干戈隊裏分王伯。風雨林中有鬼神。鐘簴絳絳他
隨步改詞壇定鼎笑。工輦側身天地更懷古。陶
令方知是晉民。彭蠡匡廬各自陳。獨攜山水出
迷津。浮沈世路分南北。訓練強兵動鬼神。淮海
千枝今合派。江天孤客莫含顰。鳩茲港裏桃源
客。猶勝先秦老逸民。十月初二日。

抱石魚銘

余郡爲邑者九。龍泉次在八。物產之饒。獨甲諸區。其浸曰遂水。產抱石魚。長不及寸。白質薄鬣。亡鱗而鮮。石齒粼粼。衆抱其下。童子密罟筠籠。伺而漁焉。日可盈把。不盈把不休也。頽汗皸瘃。炎隆亡間。得則以市。宦之巧者。吏與士之隋而蠹者。進令若守。薰薌陶貯。媚兩使者。求容焉。每時清風晏。賓筵坐列。素羹傳陳。誇啖矜脆。秘爲

土毛水錯之第一珍者。兵興以來。地荒民流。徵
采道絕。族類繁顙。其黠者乘漲軼梁。犯章貢。突
彭蠡。响濡大江。暑雨暴下。衝飈驟霆。質亦繇之
稍變。無復曩時托根石窟。約素矣。終之體猥氏
羸。不習江湖。瑣屑驗喁。鱣鮪鰭鱖。張口千頭。饑
不移瞬。魚乃悔其喪軀失實。鼓鬣而歸。形詭質
殊。其族疑之。其穴益不能庇之。燥吻觸芳。投竿
若寄。與蝦蜆螺蚌。日褻小人之腹。求如向之登

俎備珍難矣。悲哉。鄉人爲余言若此。命繪爲圖。而銘之。蓋不欲因其末路傾跌。忘厥從前質美也。銘曰。蜀產嘉魚。一斤千頭。不以充俎。惟醬是求。厥形似之。體復稍修。十百其群。抱石依瀏。土人竭漁。輸媚監州。芳香發脆。醉眼品酬。爰有點者。逐漲乘流。涵泳風濤。遂變匹儔。掉尾自矜。不辯滄洲。蝦鰕偶伍。填彼巨喉。乃戒傾危。回煦故漚。其群益駭。亡穴可投。老翁垂竿。就饑上鉤。毛

以酸笋屬饗永休。禮重棄舊傳訓多尤。物亦用然。美德不周。寫形爲圖。懲此競綵。雙筆龍泉戕鎮山。戕遂水悠悠。珍重多族。毋貽爾羞。廿五日。

天逸閣

客苑三月兩登天逸閣。不成一字。屈行書三絕。
與子長。蓋懷禹金先生。暨其尊甫朗三。不獨爲。
登臨起興也。然而余愧甚矣。咫尺流雲。是比鄰。
天荒地老。憶斯人。樓空雀去。遺編在。明月空山。
薦藻蘋。霜華竹冷。宋亡聲。石卧苔荒。影落楹。午。
夜鐙殘。簾外望。參差猶見數枝橫。滿目雲山翠。
欲開。等閒題就。却停杯。非關好句能成業。慙愧。

當年作賦才十一月初十日

敬亭山

元遺山北嶽詩東州死愛華不注若在陋邦何足數敬亭不着謝宣城斷岸何繇比天姥似矣而實非也余初登時亦甚少之且薄其亡洪川鉅洋吞吐變幻歸舟大雪倚窗返眺虛敞如面瓊臺瑤枝十里森聳乃知其負郭開嶂亭然獨立曉黛夕蟾備極三時之盼者又不知當何如也文人搖筆喜自負拔謝在杭論岱宗亦謂其

于無佛處稱尊。嘗欲易置五嶽。以天壽爲北羅。
浮爲南鍾。山爲東點。蒼爲西衡。霍爲中論。更魁
謫敬亭。當在其培塿視者。信乎天下山川。不因
其地之宜。稱細心體貼。中國封禪舍。崑崙俱卑
鄙矣。攢峰近郭。列陰森。不帶洪濤。微少致橫看。
豎躡無前人。錯寫山容。失交臂。朔風吹雨。鴉啄
雪。倒轉檣。椿緩騁轡。駢珠五珏。不足論。瑤圃層
開冠。鼇扇溼雲夜。火蒸陵陽山。腰十日枝。垂珥。

隆冬艸枯翠猶鮮。天長木喬定瑰異。文士柔腕
漫裁空千聞。一見還不啻。點蒼我已見。高旻指
作雪山得亡議。會當放脚雙峨頂。驗取遙青一
點寄。

峨眉望正東一
點青爲廬嶽

十四日

硤石江

梅季升家硤石。余辭敬亭。雪色依人。迄乙夜。方抵其所。呼酒燒燭。達旦乃別。歌以紀之。硤石江頭石。嶙峋硤石江。心水泚淪。水光石色。雪千點。濡沫莓苔。錯糾綸。我來猶帶敬亭雲。渡口蒼髯索艇巡。茅屋溼烟。壓欲欹。入門接手。足遭迤。主人都官幾代孫。手挈橡栗足冬春。橫經課兒詩。一卷白鷗滄波。不可馴。少婦當壚。親滌器。雞寒

兔首酌清醇。杯覆罍空繁霜落。磁碗還擎玉糝
勻。醕酏下堦膚起粟。膠角唬遍轉烏輪。裴相舊
基糴山路。夜氣蒼茫恐難詢。十五日

家孝章

宛句亡事。家孝章時往復次舍不輟。孝章通脫散朗。其尊人巖石。夙耽鄉嫖。手自較讐。使鬱攸弗災。孝章淹雅亡待論。而余亦得藉窺其藏。少文固陋。茲二章懷余與宛城閒步者。吉光片羽存以備珍。并志余宗之代不乏人也。臘月初六日。舟中對月懷余。莫歎人間行路難。霜稜新染舊衣寒。王孫選勝窮山屐。客子行吟傍水餐。半

世風塵雙鬢改。中天月色。一人看不才。雞肋甘
時棄。肯信磻溪老釣竿。莫春宛城閒步。雨絲天
氣漾晴空。杖履徐來。指蟬螻。隔岸新蒲綠。澗綠。
向城芳樹。落堤紅。檣搖溜放。桃花水。樵帶鋤歸。
麥穗風。何處吹殘傷客抱。倚樓人在笛聲中。

祀竈

抱朴子竈神以每月晦日上天白人罪狀大者奪紀小者奪筭紀三百日筭百日也余徙南湖僅一鼎一鑪鄉里每對人頰頰屢屬余新之今冬乃獲置一鑪築土合泥苟完炊事臘月廿三日俗傳其當上升也童子炷香手帛巾袍啓余祀焉余哂曰爾家旣乏黃羊又不却老苟有罪戾禱亦何益聊贈以詩崇飭非無意薪蒸頗倍

勞艱難遺八口。辛苦累同袍。愧乏陰方薦。不爲
漢武愾。頻年乞佛火。此地亦行庖。雙旄零落盡。
一榻耐寒炎。不習羅紈貴。翻成筭蔗甜。黃金難
禱致。白璧肯瑕添。閉閣微思過。繁詞是小嫌。

春日

丁酉春日。步自高埂。小憇家孔固書圃。落梅紛
續。草茁風柔。諸昆季六博駢羅。喤喤竟午。三旬
沈湎。一朝破除。餘酣可不待江之清矣。強嗅梅
花。不解餐春寒中酒怯衣單。閒憑五木團圞看。
輕薄東風。一霎殘籬落。風生藻井低。竹竿嫋嫋
草抽莢。餘閒分得誰來問。盡日一弓小徑西。

選詩

楊廉夫來自三泖。夜過半。俄門外剝啄聲。皆嘉禾能詩者。率懷刺執金求廉夫。選其詩。楊笑曰。生平於三尺法。亦有時以情假。若詩文則心若借眼。眼不從心。運筆批抹。取鮑恂。張翼。顧文燁。金炯四首。徐謂諸人曰。四詩猶彼善于此。諸什當須更托胎來。然被選者亡一人在。諸人相目驚駭。同乞寬假。得與姓名。至有涕泣長跪者。楊

揮出門滅燭罵曰。風雅掃地矣。余閱此每爲汗
浹。恐今人亦有如廉夫者。眉目身心。安頓何地。
時崇禎庚辰。見時輩亦往往納幣干名。標榜錯
謬。已不勝江河日下之歎。製有辭渡青閣詩。今
十八載矣。七言四韻。殿刺而請吟筒。選社垂竿。
無門。又是一番更張。羅昭諫解脫儒冠從校尉。
一枝長戟六鈞弓。余之穀臂決馳。在今日誠溫
飽第一法門也。再得一首。淺陋徑率。殊乖雅尚。

然聊可觀世。因兩存之。辭渡青閣詩。秋風江上。
仰波稜。曲折紋生萬疊層。獻賦何須親狗監。還。
家却愧負魚罾。名齊李杜終無補。學到歐韓總。
未能二十年來名下路。相看拍手盡金縢。今詩。
風雅年來潤色乾。閉門搔首笑儒冠。吟纔兩字。
頭須點。饒得一錢眼倍寬。名紙嘗隨堂吏熟。詩。
筒不救客星寒。橐韃我却慙文史。索莫江干喜。
獨看二月十九日。

讀史

徐巨源讀史至唐，不喜太宗，謂其武畧文事，超邁前王，而淵穆不及光武。豁達遠遜漢高，每臨御嘗朝，定有英詞美政，可備記注。若預爲史官，異日地者，究之破綻亦多。瑕瑜不掩，余反覆尋繹，滕王元嬰等之國，帝執手嗚咽，不能捨，建成元吉則參夷流血，狡人好語，固自難測。後得漢唐秘史，高廟勅寧獻王編於宮中者，亦主此論。

兼載溫公修資治通鑑至玄武門事身倦假寐忽一人修髯黃袍求爲曲容溫公起跪謝過曰陛下穢德彰矣臣頭可斷臣筆難移倏忽而沒又一書載唐文皇英睿通天無物不炤晚年亦惑于方術服天竺異人娑婆寐丹藥渴痢而崩如此則尚名惡死巨源之論未必亡見姑識以俟後之論史者廿四日

張于湖

張孝祥清辭壯采。勃宰南宋。粵西巖洞。題記殆盡。鳩茲雖流寓鄉。迄今人士尸祝不衰。有聞余言者。謂偉長亦大橫。余邑止一狀頭。坊表尚存。而強稱爲流寓。割屬他邦。不知孝祥蜀簡州人也。出思陵親擢。後徙居歷陽。因號于湖。成都志載頗詳。余謂巍甲亦何足恃。昌黎之孫衮冠唐多士。而昌黎名高北斗。其子若非擅改金根。後

世誰復知有果者。且鳩茲人才邇來不乏。昔賢
有云。似此山川。又當出一孫伯符。何張之足美
也。得二首嶺外。曾探勝清詞。護綠苔。蠶叢憶舊
里。江表重新隈。舉世悉尊耳。何邦不產才。山川
非寂寞。還羨他人來。臨安殿唱日通籍。是岷峨。
蜀道逢屯久。江干寄興多。烟雲思古壤。魚鳥憶
清歌。此地欣名久。風流會不磨。三月初五日

輓家河采

河采諱天驊余宗昆季中錚錚者壯年廢產薄
遊沅湘不得志抱疴歸里以今春三月初八長
逝先是初五日簡其生平所著詩文二冊顧余
泣曰驛罪通天死亡憾惟此心脾上鮮血舉以
累君言畢遂梗咽不能語余受而藏諸笥今骨
冷矣余貧亡賄賻作輓歌四章情自不可以言
奪也辦辭兒女逐荒墳淒惻猶懷舊著文夭壽

情知俱幻化。此中血淚是靈芬。當年一擲薄千金。死後青山鑒此心。不是封侯無骨相。湘江江畔少知音。孤兒三尺擁麻裳。白髮天親淚兩眶。最是關情亡着處。牙纖竹篴鎖空房。龕棺素斲薄施繇。委蛻形骸古亦然。知君寸心原不死。投余燐灼有鴻篇。十七日。

節媛

四月朔日搜河采遺藁見手書一摺載楚南某氏女死節事絕句十首并小序附錄于左漢江泊舟日有女某氏自洞庭來投死江心流至壽昌土人憫而瘞焉得寸帛于胸油楮密固展看爲絕句十首面面涕零忍讀而未敢聞也未幾邑令廉得其實以有關風化欲申諸臺省繇是傳者益衆姑識以俟後之採摭者家園一別已

經春此日含羞到漢城。忽下將軍搜括令。教人
尚敢愛餘生。征帆又說過雙姑。掩淚聲聲怯夜
烏。葬入江魚沉底後。不留青塚在單于。骨肉輕
辭弟與兄。依人千里夢長驚。歸魂欲近家園路。
報說雙親已不生。厭聽邊聲帶笑歌。幾回腸斷
嶺猿多。青鸞有意隨王母。空教人間設網羅。遮
身猶是舊羅衣。夢到瀟湘何日歸。遠涉風濤誰
作伴。聲聲遙祝兩靈妃。生小伶仃画閣時。詩書

曾托母兄師。濤聲夜夜悲。何急猶記挑鐙讀楚
詞。當年閨閣惜如珍。何事牽裙逐水濱。報與雙
親休眷戀。入江原是女兒身。生年猶遇未簪笄。
死後狂瀾歎不齊。河伯有情憐薄命。東流兼遶
洞庭西。照影江干不勝悲。永辭鸞鏡斂雙眉。朱
門空許成秦晉。死後相逢總未知。國史當年強
解親。殺身自古欲成仁。簪纓雖愧奇男子。猶勝
王朝共事臣。

習尤

徐凝廬山瀑布一條界破青山色。委不雅馴。坡公譏之曰。飛流濺沫知多少。不爲徐凝洗惡詩。又梁山噴霧巖瀑布。舊亦取徐凝詩。搆飛練亭。坡公又以爲惡。更名飛雪。用歐九六月飛雪灑石缸句。洗發俱妙。但此老胷中。一生只與徐凝合。鬧不識何解。近代楊用修亦極詆許渾。其意不亡祖述眉山。然丁卯集豈宜致喙。三千歌舞。

卯竹杖

卷之五

四十八

留髮堂

句豈空作如此解。班傳伯仲間而固短之。文人相輕習尤若此。余恐後來學武者流漫亡底時也。自昔操觚家獨絲繹心繭。旣登作者壇。誰不欲弁冕美錦。久賴生賞之。當忘淺寸瑕。定相黜舉。體若爲覩。末世習輕佻。一毛未窺鑣。畧拾前人膚炫辭。致詭辯。更兼膽決雄。彈摘亡餘善。此風不可宣。效法徒滋禍。十七日。

李北海

五月六日得李北海娑羅樹碑。碑久淪沒。是蓋萬曆間太守陳文燭玉叔別覓搨本重模者。余不知書。然每喜羅前人逸跡。對以療俗。兼文詞綺拔。益驗古人筆墨不苟。按北海名邕。字太和。江都人。初爲陳州刺使。坐仇家告枉法。下獄當死。許昌男子孔璋不識邕。上書願代死。得貶遵化尉。流漳嶺。南邕妻溫氏復上書請代。戍不報。

後以討賊豐州起刺括州復被誣枉天子識其
名詔勿治歷刺淄滑二州邕久斥外不與士大
夫接及入朝人傳其眉目環異阡陌聚觀後生
望風內謁門巷填溢未幾出爲汲郡北海太守
天寶中李林甫因柳勣之獄傳會同罪詔郡杖
殺之溫氏請代戍書亦委折古雅節錄于此邕
少習文章疾惡如仇不容于衆頻謫遠方削跡
朝端不啻十載屬國家有事泰山法駕旋路邕

獻牛酒。例蒙恩私。妾聞正人用。則邪人憂。邕之禍端。實自此始。且邕比任外官。卒亡一毀。天意暫顧。罪禍旋生。邕初蒙訊責。便繫牢戶。水不入口者踰五日。氣息奄奄。惟吏是聽。事生吏口。迫邕手書。貸人蠶種。以爲枉法。赤羅貢奉。指爲奸贓。于時甌使朝堂。手足嚴固。號天訴地。誰肯爲聞。泣血去國。投骨荒裔。永亡還期。妾願使邕得覓一卒効力王事。膏塗朔邊。骨糞沙壤。成邕夙

心。此等筆力，出自閨閣，比之今日朝秦里巫村
姬醉嘔發許，見之真爲羞死。

阿閣

初八日飲沈惕菴阿閣。閣在其宅右不數武。時主人礪石待題。方爾止咄嗟輒辦。余亦技癢。以次日製二章呈焉。遶閣藤花拂石床。平分中聖納新涼。循墻獨許幽人偶。匡坐能容老子狂。逼履天根蹲虎豹。回眸日脚下牛羊。休文八韻尋嘗事。誰是探驪破蘚蒼。十五年來小劫灰。猶將藻井煥崔嵬。江湖心事鉤簾見。丘壑精神策杖

陪枕石君方循髮壯看雲我亦望川迴登臨正
值風晴好。閑是閑愁付此杯。

積善庵

庵在上河之偏。藤佛三尊。高可尋丈。兩臂克舉。云是文皇時中官得自西洋者。余與傅平叔同舫而來。平叔宿江樓。余下榻此寺。明日平叔有句曲行。製詩二章。前期有在鬱陶。余心工拙亡暇問也。苦漱難消暑。招提一隙間。孤雲來宿莽。獨鳥起叢菅。光相髥藤古。顏墻堊堵斑。還期新月上。握手聽潺湲。江濤曾共涉。此地却分歧。是

處懷君德。何年遂我私。征袍重把看。龕火暫相
隨。句曲明朝路。蟬聲咽別離。六月初九日。

何母歌

靳茶坡以詩推淮右。余神交者久之。丁酉夏杪。
客虎阜。會稽徐五出其何母歌屬余和人奇事。
奇簪筆而抽思者。人與詩又各奇。勉爲次之。何
計。鼂犬之齋。豐貂也。若阿母與秦同五遇合。迄
詳前哲不復贅矣。丈夫七尺昂。惟慙釜與缶。梅
心酸。雪前桃李獲稱友。芳菲各自媚。誰念春風
吼。細推物理情。無寧醉酪母。所以一飯恩。王孫

起枯朽。那知巨眼存。千金重。辭受淮水湯湯流。
此類得亡有。同五自越來。中原半鹿走。挾策異
釣竿。脫粟不盈斗。怕唱玲瓏辭。日沒又到西。髀
肉愁漸殷。何嘗謀芻糗。雞黍饁不時。乃出一婆
婦。豈亡髯如戟。膽決隨群醜。亦有昨熱人。皮相
良難厚。悠悠二千載。卓識復閨牖。我聞心旌揚。
捋髭對尊酒。同是天涯客。流落胡不偶。想亡封
侯骨。此志安可苟。試問黃農前。殺青有誰某。作

歌聊自傷。此歌難出右。廿一日。

叩竹杖

卷之五
五十四

留影堂

塢影園

園可一畝遠俗妨塵舊爲文湛持相國別墅今
屬之云美位置經畫不勞而韻盡兩折度石橋
卽爲虎丘塢影之名想不踰此余曉夕躡屣罔
有間焉成二詩意不數君家辟疆也一榻幽窓
裏全亡笑語喧荷香暗度水竹徑密栽垣微雨
苔嘗潤侵晨露下溫單衫叢桂望彌覺虎丘煩
編籬剛一畝寫韻足清歡客至嘗羅几我來不

着冠坐看雲疊浪談到日三竿丘壑胷中有惟
君衽席安七月初十日

顧螺舟

螺舟南通州人其曾祖冲庵先生有大勲勞于國爲萬曆間名臣其尊甫珠巖亦成壬戌進士給事省中螺舟與余齊齒均年相遇虎丘屬余作歌漫爲賦之落日銜山山半紫短髮下侵劍池水蕩思間就澗邊酌誰是吹簫吳市子螺舟濶步眦光裂腰隱青蛇身餘舌握欵從容前致辭丈夫封侯等蠛蠓記得神皇御極日角聲吹

徹混同一軍書夜入神明廬。爬蟲梳垢無留暱。
吾祖拜手曰帝功雄。雛剪拂歸元戎涓涓不塞。
迄吾考蒲伏墀頭諫草紅。鳴吠北門六十載如。
今零落泣秋風。余感斯言心轉哀。黃牛五銖豈。
須猜威斗不銷尋邑壯。鰕魚哆口高漸臺。我試。
歌君且舞。一杯起酌真娘墓上土。巾幘有時繫。
人心。豈無人心到圭組。十八日。

半塘寺

八月初五日小憩半塘寺。金閶至虎丘七里。此適其半。寺舊有鸚鵡塢。詢之僧緇。俱勉爲應酬。似不欲余之延佇夷猶也。秋颼颼然。孤情澹永。輕舟黃葉。聊此紀懷。老刹橫江渚。鐘聲起次寥。探山還幾里。隔市只平橋。屈曲僧房徑。清虛佛閣寮。欲瞻鸚鵡塔。桐葉下蕭蕭。

割股

割股非孝之經者本草曰人肉可以愈瘵鄠人效之昌黎著論深貶焉高皇令甲獨停旌表蓋亦惡其戕體沽名自絕于天與于不孝之甚者也吳中張霍民唐友虞兩人俱以割股聞又俱一時請爲詩以彰其事張凡兩割余未及見唐則余親見之一痕長不及寸濶比箸畧殺想借此爲參朮導使功耳或繪圖或鑄版一時人士

燁然題咏余勉成六絕以謝其請張四絕種就
丹砂不教吞空垂涕淚額無門鸞刀割得殘肌
看還是高皇參養恩當堦藥果對錯紅呼吸無
靈乞帝衷癡絕惟知迎刃解敢將一箸冒天功
本草雖云療瘵好昌黎亦復著書存微茫記得
分羹語還自推敲費比倫雙雙忽復起沈疴兩
試烹煎總不訛但使高堂存白髮杯羹值得幾
錢多唐二絕作孝誰云殘體膚額天亡計淚痕

枯。總饒一箸能稱好。勝繪他年鼎養圖。借父耰鋤。類有恩。秦人赤焰至今存。披圖省識王風在。欲買比隣長子孫。十九日。

丁酉九日

九日辟疆園澄懷社集卽席分九佳兼得四豪
時同賦者爲清淵倪天章姑射喬敬五吳門陳
孝將金孝章俞無殊陸翼王袁重其侯研德陳
杓石申莘民家又王等約數十人不能悉數也
余以江右領座首唱打諢取給愧曷能已郊園
宿雨浥塵階此日登臨興味諧菊到新晴偏着
態酒逢佳節益開懷憑肱無那鄉心切短髮何

勞。座。客。排。玊。璞。吟。成。霑。醉。曉。絳。籠。猶。自。炤。高。絳。
繁。臂。丹。砂。穩。稱。袍。風。流。此。會。屬。吾。曹。當。筵。度。曲。
洵。爲。美。支。閣。清。譚。亦。是。豪。狂。態。須。教。頻。落。帽。多。
才。不。敢。更。題。糕。趙。陪。誰。得。東。籬。興。家。本。柴。桑。欲。
學。陶。

虎丘

虎丘月亡不佳者。但春苦溼溽。夏多蚊蚋。冬則嚴隆不堪。惟秋獨勝。而遊者率以八月望。簫鼓喧呶。過此則間然矣。公安解人亦云。須囂歇響寂。婆婆孤影。乃爲入微。不知塵坭溲遺。狼籍益甚。劍池可中亭而下。迄養雀澗。迴仙徑。石井泉。亡不觸嗅發噦者。獨重九後。人趨天平石湖。燉輝鮮輪盤陀。徑畝徵歌箕踞。亡地不宐。而時流

又一足鮮造天之眷念我輩豈良薄哉成七言
律一首新晴鐘鼓報聲遲正是枝頭鳥暝時千
頃蒼旻雲點染一圍寒玉樹參差尊前水調歌
嘗有刻下梁園賦是誰却笑仙陀多勝事年年
瓜餅未曾窺十四日

歌奚

金閭百日悉徬梅花樓。間入城踰三時。輒一棹
返廿五日。乃宿家有一竺爾恭遽修俱北行。惟
又王一人握手。有一治具出家樂拱壁秋水梁
園。問字四奚。侑爵竹肉競奏。雜以絃索。重頭入
破。遲韻泥人。問字猶爲朗俊。將來或放出一頭
地者。有一屬余爲詩。時值有脚疾。書此付之。聊
供排諧耳。拱壁樂句。鞞鼓應節。能諧和聲亦

當音疾徐知在手。曲罷杳難尋。秋水琵琶企脚。
北窗下。絲傳謝鎮西。繁絃隨指落。洪殺與聲齊。
梁園簫度曲。工爲媚。拋高亮。以清吹。空慈姥竹。
天籟是唇成。問字謳婉轉。隨簫鼓。清商拂落塵。
庭前羅衆伎。惟爾獨空人。廿六日。

顧同叔

同叔通州人爲螺舟從弟有俊才詩歌悲涼慷慨讀之令人泣下香奩艷體不落溫李第二乘落魄吳門賣琴賣書自給人罕有知其名者獨于余相視莫逆四章製潤余行粗載于此亦少見其一斑矣蠻烟瘴雨老戎衣歎息崎嶇跡又違誰挽天河消壁壘却令雲夢闌旂旂繞枝明月南飛迴洒淚秋風北望非湖海如君逢不易

淹留未忍卽言歸。橫戈作賦志疆場。虎嘯當年
孰雁行。百戰乾坤存倚伏。九秋窠桂歷風霜。流
離庾信空詞藻。飄泊臨邛冷鷓鴣。富貴黑頭愁
逼在。只今貂錦閔人忙。天壤孤行賦七哀。江南
留滯幾憐才。何期豪俊人千里。共舉飄零酒一
杯。西向諸侯須劇孟。南遊上客孰梁枚。惟君獨
有青眸在。俗眼如冰枉見猜。臨河攜手濯長纓。
慷慨鷹揚壯子行。此日六師爭尺土。當時下士

失長城。武陵舊恨關山笛。越水新愁草木兵。別
路江邨動禾黍。秣陵歸去最傷情。十月初一日。

趙國子

別國子六載矣。桂嶠湘源。夢寐魂勞。初冬歸自
胥門。國子跂余于長干古寺。相對蒼涼。悲喜交
集。得二首。語淺情真。不自知也。漸覺風烟老。鄉
音久不聞。經時嘗夢寐。率會且悲欣。顧我心還
壯。對君硯欲焚。滄波何處去。吾道正難云。會面
非容易。蹉跎已六秋。生涯同看劍。世事肯登樓。
不共星霜改。還期肝膽酬。關心如許語。欲說更

亡繇十一日

句曲道中

陸魯望集平陵城周十餘步草木甚蕃孟東野
爲溧陽尉日嘗領小吏騎驢吟此終風馬首日
生埃射鴨堂空石沒苔古道平陵山色好騎驢
曾有幾人來三茅山道書爲第一福地秦名勾
金壇遠望恩龍三峯翠色若可餐也勾金自古
重茅盈天外三峯削得成幸是饑驅來策馬望
中晴色最分明十一月望日

來諗居

臘月朔日歸自句曲主來諗居大美出其後先
詩稿屬余評隲朔雪冬寒跬步未舉次仲玉立
幼龍三人日慰勞外惟大美時抱阿息調笑掌
上爲歡而已得一首風雪西窗寄一隅盤餐盡
日損郇厨耽閒我欲披鴻寶到老君還眷蚌珠
饒有玄言供放浪喜無熱客混清娛霜髭羨爾
殷勤好玉茗花開笑語俱